

Was een alles passiert kann ...

=====

Amal is mir was Dumms passiert,  
da hab i mi fei arch scheniert.  
A Mo, i hab na guat gekennt,  
drückt mer a Packla in die Hand  
un secht zu mir: "I hätt a Bitt,  
wennst hem gehst, nam des Packla mit;  
ganz in der Näh, nit weit vo dir,  
da wohnt a Fraa, die grüäßt vo mir  
un gibst des kleena Packla ab,  
weil i des sou versprochn hab."  
Er secht mer Nama un Adreß,  
i söll die Anschrift nit vergeß!

I finn des Haus un klingl glei,  
un a kleens Mädla läßt mi zei.  
I schätz mal grob, des Mädla war  
vielleicht sou verza, fufza Jahr.  
"Grüß Gott, sooch, is dei Mutti da?"  
Sou fang i dann zu räidn a.  
Des Mädla guckt wie gstochna Kälber:  
"Die Mutti? - des bin i doch selber!"

Natürli mark i nacher glei,  
mei Schätzung kann nit richti sei;  
da hab i mi vergaloppiert,  
saudumm, daß des grad mir passiert!